

Faasoaina o le Alofa o le Atua

Sa le iloa e Thais se tala po o se mea e fai, ae sa manao o ia e fesoasoani.

Saunia e Carolina Maldonado
(E faavae i se tala moni)

Na tupu lenei tala i Polivia.

Sa o se taeao vevela o le taumafanafana. Sa talanoa ma taliē Thais ma lana uo o Claudia a o la savavali i le malae soka. Faatoa uma le la vasega faletaalo, ma o lea o le a la o i le matematika.

O loo i le taimi malolo o tamaiti laiti. Sa tilotilo atu Thais ia i latou o taalo.

Ona ia vaaia lea o se teineitiiti laitiiti o nofo na o ia i luga o fasitepu. Ina ua la latalata atu, sa iloa atu e Thais o loo tagi o ia.



Sa talotalo atu Thais ia Claudia e sau i le teineitiiti.

Sa faanonou Claudia ma lulu lona ulu e leai. "O le a ta tuai."

A o le'i fai atu se tala a Thais, sa savali ese Claudia.

Sa tilotilo atu Thais i le teineitiiti. Pe a ma le lima ona tausaga. Sa natia ona foliga i le va o ona tulivae, ma sa ufitia lona ulu i ona lima.

Sa saofai Thais i ona autafa. Sa sosō ese teisi le teineitiiti.

"O seki oe?" Sa fesili lemu atu ai Thais.

E le'i tali mai le teineitiiti. Sa le mautinoa e Thais le tala e fai atu po o le mea e fai.

"E mafai ona ou fesoasoani atu ia te oe?" na sosoo ai lesi ana fesili.

Sa faamimini tauau o le teineitiiti. "O lo'u igoa o Thais. O ai lou igoa?" Na iu lava ina tilotilo a'e le teineitiiti ia Thais. "Nicol."

"Aisea ua e tagi ai, Nicol?"

"E taufa'alili mai tagata uma ia te a'u ona o lo'u lapoa," sa ia fai atu ai i le va o masusū.

Sa solo e Thais foliga o Nicol. "Ou te faamalie atu na latou faia na tala. E le afaina po o a manatu o tagata."

"Latou te fai mai ou te le aulelei."

"Ia, ou te manatu e sese i latou!" Sa fai atu ai Thais ma se ataata. "E ese lou aulelei ma matua faapitoa lava foi. Na e iloaia lena mea?"



Sa mafaufau Thais i se tasi o pese e sili ona fiafia i ai mai le Peraimeri. Ua ia iloa nei le tala e fai.

"O oe o se afafine o le Atua," o le tala lea a Thais, ma uu lima o le teineitiiti.

Sa talanoa teisi Thais ma Nicol. Sa ia faamatalaina le taua tele o Nicol i le Tama Faalelagi, lona aiga, ma le toatele o isi sa alolofa tele ia te ia. Mai lea mea itiiti i lea mea itiiti, sa amata ona ataata Nicol.

Ina ua mavae ni nai minute, sa tu i luga Nicol ma fusi mau Thais. "Faafetai!" o lana tala lea.

Sa vaaia e Thais lana uo fou o tamoe ese atu ma se ataata tele. Sa manaia le lagona o le fesoasoani ia Nicol ia maua se lagona lelei ma iloa le telē o le alofa o le Atua mo ia.

Ona tu foi lea o Thais i luga. *E tatau foi ona o'u tamoe e pei o Nicol i ou tuai i le matematika!* sa ia mafaufau ai, ma ataata a o ia faanatinati atu i le vasega. ●



ATA NA TUSIAE FLAVIO REMONETTI